



Peter Olsen  
Inatsisartunut ilaasortaq, Inuit Ataqatigiit

**Ataqqinaammik aningaasat tunniunneqartartut pillugit – § 37 naapertorlugu  
apeqqummut nr. 245/2024-mut akissut**

07-01-2025  
Suliap normua: 2024 - 1595  
All. nr. 24907878

Asasara Peter Olsen,

Postboks 1029  
3900 Nuuk

Inatsisartut suleriaasiat naapertorlugu apeqqutinnut qujanaq. Apeqqutigineqartut  
tullinguuttuni akissuteqarfigissavakka.

Oqarasuaat: +299 34 50 00  
Email: [ikin@nanoq.gl](mailto:ikin@nanoq.gl)  
[www.nanoq.gl](http://www.nanoq.gl)

***Apeqqut 1: Naalakkersuisut qaqugu naatsersuutigaat eqqumiitsuliortunik  
ataqqinaatissiissutiinissartik?***

**Akissut:**

Eqqumiitsuliornermik ingerlatsineq pillugu Inatsisartut inatsisaannut allannguutit 1. juli  
2023 atuutilersinneqarput, taamaasillunilu ataqqinaammik tunissutisitsisarnerit  
akissarsitsisarnerillu inatsisigut tunngavissaqartinneqalerlutik.

Ataqqinnilluni tunniuttakkat pillugit Namminersorlutik Oqartussat nalunaarutaat nr. 43 1.  
november 2024-meersoq 1. november 2024-mi atuutilersinneqarpoq. Nalunaarut  
aqqutigalugu ataqqinaammik tunniussinissamut piumasaqaatit eqqumiitsulioriaatsit  
assigiinngitsut ataqqinaasernerqarsinnaasut agguartarnerinut piumasaqaatit kiisalu  
ataqqinaammik tunniuttakkat isertitat naapertorlugit annertussilerneqartarnissaat  
aalajangersarneqarsimapput.

Kalaallit Nunaanni Eqqumiitsuliornermut Aningaasaateqarfik pillugu Namminersorlutik  
Oqartussat nalunaarutaat nr. 42 1. november 2024-meersoq 1. november 2024-mi  
atuutilersinneqarpoq. § 13 naapertorlugu siulersuisut suliamik paasisimasallit  
ataatsimoorlutik inassuteqaataat tunngavigalugu aamma Ataqqinaammik  
tunissutisitsisarneq tunniuttakkallu isertitat naapertorlugit  
annertussilerneqartarnissaat pillugit Namminersorlutik Oqartussat nalunaarutaat  
naapertorlugu ataqqinaammik tunniuttakkamik tunniussissapput.

2024-mut aningaasanut inatsit aqqutigalugu nersornaasiisarnissanut 1,0 mio. kr.-inik  
aningaasaliisoqarnikuvoq aningaasallu Kalaallit Nunaanni Eqqumiitsuliornermut  
Aningaasaateqarfimmiit aqunneqartussaallutik. Eqqumiitsuliortut sisamat 2025-p  
aallartimalernerani aningaasartalerlugit nersorniarneqassapput, tamatumalu kingorna  
2024-mit aningaasaliissutit atorneqassallutik.

Naalakkersuisoqarfik Kalaallit Nunaanni Eqqumiitsuliornermut Aningaasaateqarfik  
suleqatigalugu nersornaasiisarnermut tunngatillugu piffissaliussamut iliuusissatullu  
pilersaarummik suliaqarpoq, suliarlu sulii ingerlalluni.

Piffissaliussat aallaavigalugit suliassamik ilisimannittut suliaqartut nersornaasigassatut piukkussaminnik Kalaallit Nunaanni Eqqumiitsuliornermut Aningaasaateqarfiup siulersuisuinut januarip aallartinnerani inassuteqassapput. Inassutigineqartut 2025-mi januarip naanerani siulersuisunit nalilersorneqassapput eqqumiitsuliortullu sisamanut aningaasartalerlugit nersorniarneqartussat kikkussaneriniq ataatsimoorlutik aalajangissallutik. Pisussat tamarmik pereeriarpata nersorniarneqartut sisamat kikkuneri Kalaallit Nunaanni Eqqumiitsuliornermut Aningaasaateqarfimmit tusagassiutitigut nalunaarutigineqarumaarput.

***Apeqqu 2: Nalakkersuisut qaqagu naatsersuutigaat eqqumiitsuliortunik nersornaasiinissartik?***

**Akissut:**

Eqqumiitsuliornermik ingerlatsineq pillugu Inatsisartut inatsisaannut allannguutissatut siunnersuummi nr. 33, 13. juni 2023-meersumi § 8c, imm. 2 naapertorlugu ataqqinaammik tunniussisarnissamat maleruagassanik ersarinnerusumik Naalakkersuisut suli suliaqanngillat.

Nersornaatit nalunaarummi malittarisassat naapertorlugit tunniunneqarsinnaanissaat naatsorsuutaavoq.

Inussiarnersumik inuulluaqqusillunga

Aqqaluaq B. Egede